

Sues, e ha fato compir de butar in aqua la so armada per insir. Dice esser galie, fra bastarde et sotil, numero 20 et 4 fuste; et vol al tutto la parti fin do mesi, che credo sarà più de tre et forse quattro, perchè i aspetta i homeni da la Turchia, et poi non ha le cosse li bisogna. Diceano voler venir de qui; che non credo. Se rasona fra mori, el Signor turchi per questo anno farà pocha armada, ma fa exercito terrestre verso le parte del Sophi; *tamen* non è da far giudizio de tai ragionamenti, perche non son con fondamento. Ben se ha che el Sophi con quel Signor de la bareta verde hanno fato coleganza, et hanno el fio del fradello del Turchi con loro. Si dice fanno exercito contra el Turchi. Et a questi zorni passati havea auto rota de 6000 persone, a quelli confini el Turchi. Per quanto se giudica, el Signor turco torà quella impresa; Iddio fazi la guerra resta fra loro, e che stiamo in paze. Se ha per certo come el re di Colochut è morto, et quello è intrà Re à fato paze, e dà recapito a portogalesi; sichè non li resta contrasto in l'India; pono praticar *pacifice* per tutto. Se questa armada del signor Sophi non li mete fin, *actum est* che se possa più navegar in ste parte per comprar spezie.

38 *A dì 18, la mattina.* Nulla fu di novo. Letere di Padoa. Nulla da conto. De i nimici non fanno nulla.

Da poi disnar, fo Pregadi per far i Savii ai ordeni, per aver ducati 1000 da quelli rimagnerano; per provarsi di la età darano ducati 200 per uno come si suol far, et arà la pruova. È pochi zoveni che si fa tuor, zercha numero 11. Et cussi sono electi questi: sier Andrea Loredan qu. sier Bernardin 130, sier Piero Lion qu. sier Alvise 121, sier Piero Alessandro Lipomano qu. sier Nicolò 118, sier Hironimo Querini di sier Francesco 116. Soto, sier Francesco Morexini di sier Antonio 108, et sier Marco da Molin di sier Alvise da San Zulian 107. *Mirum est* ch'el Molin sia cazuto, hessendo il primo dil Colegio, etc.

Di Cipro, fo leto letere di sier Zuan Paulo Gradenigo luogotenente, di 17 Zugno. Con avisi auti di nove, et zercha formenti. *Item*, contra i sindici, cargandoli di quanto ha fatto, et zercha il quarto a li stipendiati etc., volse li fosse dato. Tolseno 25 per 100 di pena, poi ha voluto non li habi; e altre particolarità.

Di Damasco, di sier Andrea Contarini console, di Zugno. Zercha la Signoria voy darli la libertà a tuor a usura. *Item*, dil vin, ch'è cossa

buona a la nation *ut in litteris*, che per parte fo vededa, *videlicet* di vin servir quelli mori manda a tuor da esso consolo.

Di Alexandria, di sier Tomaso Venier console, di 14 Lujo. Come l'armada ha fato far il signor Soldan a Suez di 20 galie et 4 fuste era partita, e andata al Ziden, perchè quelli del Ziden li havia mandà a dir che non poteva resister contra portogesi; et *etiam* li era stà mandà 10 barze di marcandantie per agumentar la dita armada. *Item*, scrive come il signor Soldan havia dà danari a mamaluchi 2560, e li mandava a li confini di Alepo per dubito dil campo dil Turchi; el qual Soldan havia 12 milia mori a quelli confini a cavallo.

Dil provedador di l'armada sier Vincenzo Capello, date a Corfù, a dì 2 Lujo. Come è li con . . . galie; 4 ne havia mandà a Liesna, e quella del ducha di Nisechia era partita; la qual a so spese era venuta a servir, ma non potendo più star, il so racomito li dimandò licentia, e non potendo tenir più le zurme si è levato. *Item*, scrive aver dil Zante che in l'Arzipelago erano 20 fuste de turchi, tra le qual 8 di 20 banchi l'una. Per il che si voleva levar e andar in quelle acque; ma non pol per non haver biscoto: ha scritto e fato provision per averne.

Fo leto *una letera dil podestà e capitano di Mestres, sier Donado Honoradi.* Zercha alcuni vilani quali hanno fato setta, vanno armati, hanno amazzato uno iacomo qu. Bortolomio de la Croze. Vol licentia bandizarli, et hanno Marco Lautri e uno fante di sier Michiel da Leze feriti. 2 di no, 166 di sì.

Fu posto, per li Savii, di suspender tutti li pagamenti de li Camerlengi, e che tutti i danari si trarà, si mandi in campo. Et fu presa: ave balote 20 di no, 157 di la parte, e fu presa.

Et licentiat Pregadi, restò Consejo di X con la zonta.

Qui farò mentione di tutti li zentilhomeni venuti per danari a Gran Consejo, et prima quelli di anni 24 provadi.

Sier Andrea Loredan qu. sier Bernardin, qu. sier Piero.

Sier Andrea Trivisan qu. sier Polo, qu. sier Piero.

Sier Piero Alexandro Lipomano qu. sier Nicolò, qu. sier Andrea.

Sier Zuan Francesco Balbi di sier Piero, qu. sier Benedetto.

Sier Filippo Foscari di sier Francesco, qu. sier Filippo procurator.